

**Châng thlan:** *Daniela 1:20.*

**Zirlâite tân:**

**Hriat tûr:** Khawvêlah hian Pathian tâna thuhretu an nihna anga an mawhphurhna an hria ang.

**Vei tûr:** Mi dangte hmangaih leh zahna kawngah an ðhang lian zêl ang a; chutiang rilru chu nei ve tûrin mi dangte pawh an zirtîr bawk ang.

**Tih tûr:** Pathian lakah leh anmahni lakah ngei pawh engmah ui then awm lovin an rinawm tlat ang.

### THUPUI THEN

#### I. Hriat tûr: Khawvêl tâwp thleng pawhin ka thuhretûte in ni ang

- A Eng vângin nge Daniela kha thuhretu a nih?
- B Eng tiang kawngte-in Daniela kha thuhretu a nih?
- C Eng tin nge mi tilrehte hotupa khân Daniela *testimoni* kha a lo chhân?

#### II. Vei tûr: Pathian kan hmangaih chuan kan mihringpuite pawh kan hmangaih vê ang

- A Isua'n mi pakhat hnêna a nu leh pate *haw* târa a hrih kha eng nge ni a awmzia? (*Luka 14:26*).
- B Eng tin nge i nu leh pate emaw, i ðhiante emaw kha Pathian ring lo mi pawh lo ni mah se, an lakah hmangaihna i lanfîr theih ang?
- C Eng vângin nge hmangaihna nêna thu dik sawi hi a thu dik lâwng lâwng sawi tawp âi chuan awmzia a neih zâwk le?

#### III. Tih tûr: Mihring leh thianghlim ni tûrin

- A Eng tin nge Pathian thupêkte rinawm taka zawmna leh, kan ngaih dân min ðâwmpui lotu kan ðhiante leh kan chhûngkhatte nêna kan inlaichinna hi inbûk tâwk takin kan kalpui theih ang?
- B Eng vângin nge thianghlim taka nung lo chuan kan mihringpuite hi hmangaih theih a nih loh?

**KHÂIKHÂWMNA:** Engmah ui ðhen awm lova mihring rawn ni pumhlûm ðhak Isua thiltih hian khawvêla chêng Kristiante, a bîkin Seventh-day Adventist-te nun dân tûr dik tak chu a târ lang Chiang hlê a ni.

### INZIRTÎR DÂN TÛR

**RAHBI 1—Chawk phûr rawh**

**Bible châng thlûr bing tûr:** *Daniela 1:15, 17.*

*Thlarau ðanna atâna thu pawimawh: Pathian chuan a mîte hi khawvêl hnêna a lalram thutak hril ðhîn tûrin a duh a. Chû thupêk tithlawhtlin kan tumna kawnga zawhna lo awm fo chu eng ang hmanruate nge kan hman ang tih hi a ni. Daniela bû-ah hian thutak chu sawi chhuah a nihna hmanruate nêna a inkûngkaih tlat a ni tih kan hmu a. Eng lehkhabu mai pawh hi a ziah dânin kawngro a su thui thei hlê a ni. Daniela pawhin hei hi a hre Chiang a. A bul vêla mîte nêna an inkûngkaihna, anmahni a biak lâmlâm ðhîn dân, a ei a in dân, leh amah a intâr lan dân thleng khân thlarau lam thuchah puan chhuah a tum nêna a inzawm kual vek a ni.*

**ZÎRTÏRTUTE TÂN BÎK:** Tûn kâr zirlâi hian Pathian lak ata hla taka awm leh, amah hawtu khawvêla thuhretu kan nih dân tûr min zirtîr dân a. Daniela ang khân khawvêlah hian saltâng kan ni a, hmuh theih loh leh mîte hriat hlawh lo tak lalram chanchin chu kan hril mêk a ni. Babulon lal rawngbâwl reng chung a Pathian laka rinawm tlat Daniela leh a ðhian pathumte thil tih dân a tang hian zirlâi kan zir dân a. Pathian ngaihsak miah lohte zînga an awm lâia chona an hmachhawnte leh thuhretu an nih dân kawngte kha kan zir ang. An thlarau lam nun leh an nî tin nuna an beiseina an lan chhuahtûr theih dân pawh hriat kan tum tel bawk dân a ni.

**A sawi hawn nân:** *Daniela* bû hi Seventh-day Adventist-te tân phei chuan a pawimawh leh zual hlê a; a chhan chu he lehkhabu-ah hian mi dangte (Kristian dangte pawh telin) laka kan danglam bîkzia tilangtu thutak eng eng emaw a awm vâng a ni. Vânduaithlâk takin, he lehkhabu hian a firfiak zâwnga sâkhaw kalpuitute a híp êm êm mai a. Thil mak angreng deuh erawh chu, Daniela bû hian Bible-a lehkhabu dangte âiin mi tin a huap kim bîk hi a ni. Mite, a bîk takin tâna kan hun tawn mêk atâna beiseina kan mamawh awm chhun chu min pe.

### **Sawi ho tûr:**

- ① Daniela bû hian eng vângin nge ngaihthah a hlawh fo?
- ② Daniela bû atanga beiseina thuchah kan chhar chhuah theih awm chu eng nge ni?

### **RAHBI 2—Zawng chhuak rawh**

**ZIR TÛRTUTE TÂN BÎK:** Keini Seventh-day Adventist-te hi chuan Daniela bû hi hre bel hlê angin kan inngâi tângpui a. Chuvâng chuan kan lo sawi tawh thîn ang baw kha i sawi nawn tawh lohna tûrin i zirlâite hnênah a tum khatna atâna zir ve chauh ni anga inngâi tûrin hrilh ang che. Hê lehkhabu hi a rilru tharin chhiar sela, a bu chhûnga hrilh lâwkna thûte hi hriatthiamna thar leh thlîr dân thar nei baw rawh se. Chutianga hriatthiamna thar chu ni hnuhunga chhiartûte hnênah chuan tiam a ni tawh a, a chhan pawh he lehkhabu hi tâwpna hun a thlen hmâ chu châr tlat a nih thu sawi a nih vâng a ni (*Dan. 12:9*).

### **ZIR ZÂUNA**

#### **I. Hmêlmâte ngainat hlawh (*Daniela 1:9*)**

Danielan Pathian laka rinawm tlat reng a tum chiah khân thilmak tak mai a lo thleng a: “Tichuan, Pathianin Daniela chu tilrehte hotu laka duhsakna leh khawngaihna chu a dawntîr ta a” (*Dan. 1:9*). Danielan milem be mîte nêna inremsiam a duh loh hnua Pathianin a

hmêlmâte thilunga ngainatna leh zahna a rawn dah ve *ngêl* mai hi a ngaihnawm ngawt mai.

He lâi châng hian thil pahnih min hrilh a: Daniela leh Hebrai tlangvâl pathumten an nunna thâpa a thu zawm an tum hmâ kha chuan Pathian pawhin thilmak a thlentîr rih lo va. Chuvângin Daniela khân Pathian laka a rinawmna fiah a nih hmâ kha chuan amâ duh ang châw leh chawhmeh a dawng ngêl mai lo rêng a ni. A châng hi chuan Pathian hian amah nêna kan kal dun theih nân kawng awlsam min siamsak thîn ngei mai a, “kawng ngîl takahte pawh mi a hruai bawk thîn” (*Sâm 23:3*, JPS); nimahsela, kawng tam takah hi chuan kan thurin leh dinna lungpui kalha thil ti tûra thlêmna hi kan tâwk fo sî a nih hi.

A dang chu, Pathian laka rinawm tih hi khawvêl mîte laka dik lo taka awm tihna a ni kher lo a ni tih min hrilh bawk. Daniela hian mi dangte laka danglam nih leh lalber sâwmna thu chu hnâwl titlu mah sela, mi tilrehte hotu chu a la zah reng tho va, inphah hniam takin a la dâwr chhunzawm zêl tho a ni (*Dan. 1:8, 12*). He lâi châng hian Danielan a pû a ngainat thû leh a zah thu a sawi lang miah lo hi chu a mak angreng viau mai. Kan hmêlmâte hi kan hmangaih tûr a ni satliah mai lo va; an thintlungha hmangaihna chi kan tuh tûr a ni bawk; chû chu anmahni kan hmangaih ngeizia a lanna tûr pawh a ni.

**Ngaihtuah teh:** Eng vângin nge kan thenawm khawvêngten min ngainatna hi an laka thuhretu nihna kawnga min puitu t̄ha ber a nih le?

## II. Thuhretu ngâwichâwi chu (*Daniela 3:26–28; 2:11, 21*)

Miin Pathian a ring a ni tih tilang Chiangtu ber chu amâ nun a hman dân a ni. Hebrai tlangvâl pathumte *testimoni* awm chhun chu rawhtuina meipui a t̄anga an dam khaw chhuahna kha a ni a. Anmahni theihna leh fêl vâng rênga dam khaw chhuak an nih thu an sawi lo tih hi i lo hria em? A t̄awng pawh an t̄awng chhuak lo hrim hrim zâwk a. “Mei zîng ata chu an lo chhuak ta a” (*Dan. 3:26*) tih

thu hi kan hmuh chhun chu a ni. Langsâr ber chu Pathian a ni a. Hei tak hi Nebukadnezzara pawhin a hriat zui tâk ber pawh a ni rêng bawk: “. . . Pathian chu fakim awm rawh se; ani chuan . . . a chhiahhlawhte . . . chu a chhanchhuak ta a” (*Dan. 3:28*). Thuhretûte hi chu sawi lang ve tho mah se, a pawimawh zâwk an ni lo: “amah ringtûte chu” (*Dan. 3:28*) a ti ve lek chauh a ni. Chuti chungin a sawi uar ber chu “amah” Pathian a la ni tho. Hei hian thuhretu nih dân hi Daniela bû-in a sawi uar ber chu a ni tih a tilang. Hêng Hebrai tlangvâl pathumte hi chuan anmahni an intawktarh rêng rêng lo (“Pathianin ka tâna thil a tih hi han en teh!”). Pathian chauh hi chhuan tûr awm chhun chu a ni sî a (*1 Kor. 1:31*).

**Ngaihtuah teh:** Mi tu emaw-in nangma thiltih avânga thangthat a lâk hlauh tum emaw, ama thiltih chu nangmahin a tih âia nêp zâwk a ni chung a hotûte hriat leh fak a hlauh zâwk hlauh avânga a i lunghnûr êm êm tum kha ngaihtuah la. Chu i thil tawn chuan eng rilru nge a puttîr che le? He thu hi Thuhritu 9:11 behchhana ngaihtuahna sêngin sawi ho rawh u.

### **III. Chibaibûkna Dinmun Hlahuawm (*Daniela 3:7, 8:11*)**

Daniela kha Jerusalem atanga hla taka saltânga awm leh, milem be mîte lal ina hna thawk a nih leh zêl bawk sî avângin “chibai bûkna” chungchâng hi lehkhabu-ah pawh thupui ber a ni rêng a. Hemi thû hi a rinawm leh rinawm loh fiahna hmasa ber ei leh in thû-ah pawh khân Chiang takin a lo lang tawh a. Ei thiàng lo thil a ei duh loh chhanah khân Daniela chuan Bible-a thil siam chanchin inziahna châng hi a rawn thur chhuak rêng a nih kha (*Dan. 1:12; Gen. 1:29*).

Rinawm leh rinawm loh fiahna dang chu lalin rangkachaka a siam milim hrawl tak chu chibai bûk tûra thupêk a chhuah khân a lo thleng leh a. Kha milim kha amah Nebukadnezzaran a mumanga a hmuh milim ang taka a din niin, chu milim chu Pathianin “ram a rawn din ang a, chu chu a chhe tawh ngâi lo vang” tih thutiam nêna a tlâng a kawm a nih ngê ngê (*Dan. 2:44*). Nebukadnezzara

rilru-ah chuan Babulon lalram khân Pathian lalram chu a rawn thlâk tawh a. He a ngaihtuahna hian Pathian dinhmun luah duhtu Babel in sâng satûte (*Gen. 11:4*) âtzia kha min hriat chhuatûr leh a ni. Chu mai chu ni lovin, Daniela bû-a kan hmuh dânin, “ki te tak tê (*Dan. 8:9*) leh “hmâr lam lal” (*Dan. 11:15*)-te pawhin hetiang rilru tho hi an rawn pu ve leh bawk dâwn a (*Dan. 8:11, 11:31*). Hêng chibai bûkna dik lo tak takte bitum zêl tûr hian Daniela leh a ðhian pathumte bâkah, Lalber Nebukadnezzara ðawngtainate kan hmû a. Tichuan, Bible-a ðawngtaina dang kan hmuh tam takte ang bawkin (*Sâm 1:1, 119:1; Thup. 1:3*) Daniela bû pawh hi malsâwmnaa khâr a ni ta a ni (*Dan. 12:12*).

**Ngaihtuah teh:** Daniela 3 thu beh chhan hian chibai bûkna dik leh chibai bûkna dik lo ziarâng hrang hrangte chu sawi la. Eng tiangin nge rimâwi (music) hian chibai bûkna dik lo-ah hnâ a thawh ve? Eng tiangin nge ðawngtaina hi Pathian Thu zirna nêna a inzawm le (*Dan. 9:2, 3*)?

### **RAHBI 3—A taka nunpui tûr**

**ZĪRTĪRTUTE TÂN BĪK:** Kan tûnlâi hun, hriatna sâng tak nei chung a engkim mai rinhlelhna thinlung nêna thil kan thlîr tawhnaah hian, puithûna thil âthlâk tak tak leh rin dân mak pui puiin min chiah hneh êm êm lawi sî a. Kawng leh lamah chuan, sâkhaw lâk firfiakna hian tharum thawhna thlenin, inbumna chi hrang hrang a hring chhuak a, beiseina dik lo tak tak mi a siamsak bawk. Mihringte hian vân Pathian, Pathian dik tak chu an hnâwl miau avângin an dinhmun lungchhiat thlâk tak tikiangtu tûr chu anmahni-ah an zawng ta mai a ni.

### **Ngaihtuah zui tûr/a taka nunpui tûr zawhnate:**

Daniela bû aţanga kan thil zir chhuahte kha kan hun tawn mêkahte hian hman ðangkai tum la, tichuan hêng zawhnate hi i chhâng dâwn nia:

- ❶ Eng vângin nge Daniela bû hi kan hun tawn mêk atân hian a pawimawh? Eng vângin nge ei leh in thu hi thil pawimawh tak a nih?
- ❷ Ki tê tak tê-ina chibai bûkna a phût tlat mai hian hrilhlâwknaah eng nge pawimawhna a neih? Eng tin nge hê a thil phût âwm ang lo tak mai hi mi dangte hnênah an ngêng chhun lo zâwngin kan hrilhfiah theih ang?

#### **RAHBI 4—Boruak siam rawh**

**ZĪRTĪRTUTE TÂN BĪK: Daniela hun leh kan hun hian inanna tam tak a neih rualin, danglamna eng eng emaw pawh a nei tho bawk a. Daniela hunah kha chuan mîte kha an sâkhaw mî êm êm tângpui a; amaherawhchu, milem be mî an ni. Tûnlâia mîte hi chu milem be mî an ni ve lo nâ-in an sâkhaw mi lo êm êm thung. Hê an inan lohna hi engtin nge kan chin fel theih ang? Eng vângin nge mi tam tak hian kohhrante leh Kristan rinna hrim hrim hi an rinhlelh deuh tlat le? Hê boruak inmung chho chak tak mai hi kan hmachhawn theihna tûrin Daniela bû aţang hian zirlai zir chhuah tûr kan nei em?**

#### **Tih tûrte:**

- ❶ I class member-te kha group sarifah then darh la, tichuan group tinte chu Daniela ţawngţaina pakhat zêl sawitîr ang che (In class-ah awm in tlem deuh a nih chuan, group pakhatin ţawngţaina pahnih pathum pawh chang kawp mai se). Group tinte chu an ţawngţaina sawia an rilru hnehtu sawi tûrin i hrilh ang a, chûngte chu group dangte nêna sawi ho tûrin i sâwm dâwn nia.
- ❷ Eng vângin nge mi thiltitheih deuh leh hausa deuchte, lehkha thiam deuchte hnêna thu hrilh hi a harsat fo le (kan hrilh theih loh avâng maia mahni insawi fihlîm tum lovin, kan hrilna hmanrua lam hi rilru-ah awm zâwk se). Eng vângin nge Daniela khân thuneitute leh lehkha thiam tak takte hnênah thû a hrilh theih bîk? A tih dân hmang aţang khân zirlai zir chhuah theih kan nei ve em?